

Maart 2, 2020

www.awemainta.com

www.facebook.com/awemainta

noticia@awemainta.com

583-1400



AWEMainta

TE CU AYERA TARDI NADA DI PISCADOR, PAULUS (PAU) MARTIJN



Pagina 3

Robert Candelaria (AVP) na Endy Croes (MEP)

“BO NUNCA POR SINTA NA MESUN BANDA DI HUSTICIA CU MI!”



**INVEST
SECURE**

We don't just say it ... We Guarantee it !!!



24 Years

*Nos ta ofrece trankilidad,
protehando nos comunidad.*

Pa mas informacion yama 582-7252



Robert Candelaria (AVP) na Endy Croes (MEP)

“Bo nunca por sinta na mesun banda di husticia cu mi!”

RECIENTEMENTE por a nota cu Parlamentario Endy Croes di fraccion di MEP ta tira lodo riba tur contrincante politico. Talbes e ta pensa cu ta di e forma aki e tin cu sirbi su pais.

“Ta mi conviccion cu sirbi pais ta algo totalmente diferente. Sirbi pais mester ta algo noble y pesey ami no sa baha n’e nivel di politica ey pa contesta su atakenan nunca. Tin asina hopi cos cu mi por bisa di dje, pero mi no ta mira ningun balor agrega den esaki.

Su pasado, su potret den boei, e condenanan, ta papia pa nan mes. Pueblo sa caba ken e ta. Nos 2 tin algo en comun cu ta husticia. Ami tabata traha pa haci Aruba un lugar mas sigur y e tabata traha pa fix su mes y haña su mes den cel.

Pesey mi no ta bay dedica tempo na dje, pero si n’e Minister Presidente cu mester sa mihor”, asina Parlamentario Robert Candelaria a cuminsa su contesta durante un conferencia di prensa.

KEDA LEU DI POLITICA

Nos mester traha na halsa e nivel di politica na Aruba y stop cu e nivel di politica actual. P’e motibonan aki di polarisacion extremo, hoben y profesion-alnan cu tin hopi pa brinda nos pais, no kier drenta politica. Ora bo a studia y bo tin un bon trabou cu bon beneficianan, dificilmente lo bandona esey pa sirbi nan pais den politica, teniendo cuenta e atmosfera hostil y baho cu algun politico ta crea.

Nos mester por diferencia di opinion riba issues manera maneho den Gobierno, pero mester hiba e discucionnan aki sanamente, bon argumenta y riba e tema. Mester bira cla cu ora bo ta purba di susha number di bo contrincante, bo no a sirbi bo pais den ningun sentido. Loke ba logra ta muestra ki tipo di hende abo ta di berdad. E ta bisa hopi mas di Bo cu e ta bisa di esun cu Bo ta trata na susha.

TRABOU DI PARLAMENTARIO

Trabou di un Parlamentario ta nifica cu mester controla Gobierno y actualmente tin un Gobierno cu bastante cos canando robes y cu mester adresa. Pueblo ta sclama cu nan no por sigui carga e peso di e Gobierno ni di su mal maneho, pero tog bo ta mira cu ta scoge pa laga e trabou di Parlamentario mes para un banda pa busca issues pa susha number di otro. Con atakenan politico asina ta yuda e pueblo?

CONTESTA NA MINISTER PRESIDENTE

Mi a bisa cu mi lo no reacciona riba e Parlamentario Endy Croes, pero lo mi contesta Prome Minister Evelyn Wever Croes si, y lo ta bon pa mi splica dicon mi lo contesta e si. Mi a pensa hopi largo riba esaki prome cu mi a dicidi pa contesta.

MI TRAYECTORIA

Laga mi splica prome algo di mi mes. Despues cu mi a caba mi VWO na Amsterdam, mi a studia pa Inspector di Polis na Nederlandse Politie Academie na Apeldoorn. Mi a conoce mi casa na Hulanda y nos a casa aya. Mi casa ta Arubiano y mi a scoge pa bin traha na Aruba den Cuerpo Policial. Mi mama ta Arubiano, mi yuinan ta naci na Aruba y tur mi tanta, omo, primo y primanan banda di mama, tur mi amigonan y coleganan ta di Aruba. Ora mi a bay traha den sector priva, tambe semper mi a traha pa empresanan di Aruba y den cuadro di esaki mi a muda cu mi famia pa bay biba y traha na Corsou pa empresanan di Aruba!

BEK NA ARUBA Y DEN POLITICA

Cu mi a wordo aserca pa bin bek pa sirbi mi pais, no ta nada straño. Cu mi estudio y preparacion, mas biaha mi a wordo aserca pa trabounan y mi no ta considera di a haya un nombramento politico. Cu mi a traha como consehero

di Minister y den cuadro di esey a haci algun biahe y tambe muda bek pa Aruba no ta nada contra regla of ley. Cu mi a dicidi pa acepta pa bira activo politicamente y subi lista di AVP y cu awor mi ta miembro di e fraccion di AVP representando pueblo, tambe ta algo cu a bay segun tur regla y procedura.

DICHO DI UN PASTOR

Mi a tende un Pastor bisa algo hopi importante riba e punto aki, cu ta duna un principio importante pa sigui den bida y sigur den un trabou manera esaki. E Pastor a bisa cu ora hende tira lodo riba bo, bo no mester trata di kit’e. Lag’e seca y e ta cay di mes y ta laga un pleki limpi limpi atras!

PROME MINISTER A CAY DEN TRAMPA DI SU PARLAMENTARIO CON-DENA

Mi a keda asombra cu nos Prome Minister tambe ta presta su mes pa participa na e tipo di politica aki. Un señora cu tin un pais cu hopi reto su dilanti pa goberna, ta scoge pa presta su mes pa baha n’e nivel di politica aki, lagando su trabou para pa hinca energia y tempo den rebaha su mes y rebaha e posicion di Minister Presidente.

PUEBLO NO KIER E POLITICA AKI MAS

Cu excepcion di algun seguidor di Prome Minister y su Parlamentario, pueblo en general no kier e tipo di politica aki mas. Paisnan cu kier sigui desaroya nan mes y crece no por sigui hiba un politica di antes.

Na 2020 hende kier un Gobierno cu ta traha pa su pueblo y no un cu ta wordo encabesa pa un lider cu ta orkestra atakenan baho contra su contrincantenan. Niun hende no ta kere nan mas y esaki lo aleha hende di nan y lo sigui polarisa e pais mas y mas.

CONTESTA PREGUNTA PERSONAL

E Prome Minister mester tabata sa mihor ora cu na hopi ocasion nos a manda pregunta por escrito pe y e nunca a contesta. Pero awor cu e ta haña pregunta cu tal bes e mester a orkestra pa trata na mancha otro, e ta contesta den algun dia.

Nos ta pensa cu un prome mandatario mester traha na eleva e nivel di politica den su seno y pafo di su seno. E mester lucha pa crea brug entre partidonan y no pa kibra esaki. E Prome Minister mester goberna un pais hunto cu su Ministernan pa hiba Aruba na un nivel mas haltu y no mas abou.

FUTURA

Mi a keda asombra cu un Premier cu mester tabata sa mihor, ta wordo cuestiona personalmente tur dia riba nombramento politico cu e ta tilda otro di dje. Djis pa menciona un ehempel, den e proyecto Futura tin nombramento di hopi famia y conociman di dje den posicionnan cu salarionan haltu, anto scondi bou capa di fundacion.

BUREAU INTEGRITEIT

No ta straño cu un Minister Presidente cu mester sa mihor, no por logra lanta un Departamento di Integridad den 2 aña? Un bureau asina importante pa nos pais cu mester funciona na un nivel riba tur partido politico, ainda no ta logra pa lante. Esaki e mester hinca energia den dje y no den presta su mes pa bay den un nivel di politica infantil.

Mi coleganan y mi mes a haci preguntanan riba e.o. RDA, Elmar, bufete di abogado y nan costo, conseheronan, investigacion di oro y e envolvimento of conocimiento di e Prome Minister den esaki, a pidi casi 10 biaha pa reunionnan publico riba enseñansa.

Nunca nos a haña contesta ora ta trata algo cu ta na interes general. Ora ta trata interes personal of politico si Prome Minister ta parse di ta prome para den rij pa yama su Parlamentario y wak den spiel patras pa mira unda mas por tira lodo.

GOBIERNO DEN SU “LASTLAP” HUNGANDO “PANIEK VOETBAL”

Pero pa mayoria di nos ta hopi cla kico ta pasando aki, ta simplemente cu e rosea cayente di pueblo a cuminsa yega na garganta di e gobernantenan. Awor ta momento cu mester purba susha otro, tira lodo, pasobra nan sa cu pa ora nan caba di pasa tur e medidanan cu nan mester pasa pa cubri e aumento drastico di gastonan di operacion di tur nan famia cu a emplea den Gobierno, cu pueblo sin duda lo manda nan cas “per direct”.

Ta algun siman caba ta notando cu Ministernan tur a cuminsa skop bala pa loco estilo “paniek voetbal” y pio ainda cu rato rato nan mes ta anota “auto gol” tambe. Ban laga nan keto pa awor, pasobra e wegá lo caba malo pa nan, djis pa nan hugada mes!”, Robert Candelaria a conclui su comentario.

Te cu ayera tardi nada di piscador, Paulus (Pau) Martijn

T'ASINA cu un grupo di 4 piscador amigo a sali diabierna bay pesca y tira pesca na Baho. Ora cu anochi a cuminsa sera, ta 3 piscador so a bolbe y a falta di Pau Martijn. Esnan cu a bay pesca ta Angelo Stamper, Frank Vos, y Alex, pero Pau Martijn no a bin bek.

Unabes cu a bira conoci cu Pau Martijn ta perdi, varios boto a sali pa buske.

Nan a sali cu e boto Gislaine di un motor. Algun sambuyador a bay Baho y a haya un speargun, cu ta parce esun di Pau Martijn. E boto cu cual e 4 amigonan a sali, esta Gislaine, ayera a bolbe sali, y e biaha aki cu señora di Pau Martijn, pero nan a bolbe sin e piscador perdi.

Minister Andin Bikker a anuncia cu Gobierno hunto cu Warda Costa di Caribe Hulandes, Cuerpo Policial Aruba y Directie Buitenlandse Betrekkingen y den contacto cu Embahada di Reino Hulandes na Caracas, a logra pa activa autoridadnan Venezolano pa coordina nan maximo esfuerso den cuadro di "Search and Rescue" di e piscador perdi Paulus Martijn.

For di den dia un grupo di 4 amigo piscador a sali pa bay tira pesca na Baho den awanan teritorial Venezolano. Na dado momento e tres amigonan a perde "Pau". El a keda demasiado largo bou di awa. Nan ta papia cu el a uza dos tanki di oxigeno den e proceso. Ainda ta hincando e puzzel den otro, pasobra e declaracion di e tres amigonan ta poco

diferente di otro. Ta trata aki di Angelo Stamper, Frank Vos y Alex.

Diadomingo mainta tabatin varios amigo di Pau na Zeerovers unda algun boto a bolbe sali den un accion di buskeda. Tin boto cu a sali for di diasabra anochi caba y otronan a sali ayera mainta tempran pa mira si por topa cu Pau cerca di Baho. Tur cu a bay a bisa si cu lama ta masha malo mes, o sea cu e coriente ta masha halto mes y cu no ta facil nabega.

E amigonan a sali abordo di e boto Gislaine, number cu Paulus a pone pa su boto, como honor na su yiu muher. E boto ta color blanco cu strepi blauw. Nan ta mara na Rodgers Beach na San Nicolas y ta for di eynan a sali rumbo pa Baho pa tira pesca, manera nan sa haci mas biaha.

Solamente cu e biaha aki Pau a perde y e amigonan a opta pa bin te Aruba bek pa bati alarma, lagando Pau atras. Awor tur otro boto cu a bay no a logra topa cu Pau mas, ni na Baho, ni den becindario.

Ainda tin speransa cu un otro boto lo por a pasa duna Pau un "cabel di boto" pa canto. Famia y amigonan ta den oracion pa por logra haya Pau bek sano y salvo atrobe.



Foto: 24ora.com

Booshi Wever:

Mas importacion di hende di afo ta un quickfix cu ta hiba na e “shortcut to hell” pa e Arubiano!

HABRIENDO e luna cu mester ta e luna di celebracion di nos simbolonan di identidad, ta hopi importante pa nos, en bes di pensa riba fiestamento, nos para keto y reflexiona riba e rumbo cu nos kier nos pais bay y te con leu nos por salvaguardia nos identidad como pueblo, representa dignamente den nos himno y bandera.


“Nos medionan social sinembargo mas ocupa mas cu henter un polemica rond di celebracion di Aruba-dag na Hulanda y ken ta bay of keda sin bay, mientras cu UPP ta kere cu nos pueblo mester dedica mas atencion pa e nifcado di un dia asina. Esta di ser orguyoso di nos pais Aruba y orguyoso di ta Arubiano, pasobra nos tin un preocupacion grandi pa cierto desaroyo cu ta tumando luga actualmente. Y si nos no tene cuenta cu esaki, lo por nifica cu e Arubiano lo ta riba un “SHORTCUT TO HELL” mas lihe cu nos ta kere.

E preocupacion aki di UPP tin di haber cu diferente articulonan cu a bin ta wordo publica e ultimo simannan, mas tanto den e corant Amigoe, na unda ta señala cu pa mantene nos nivel di bida lo ta necesario pa habri porta pa mas inmigracion.

Kico ta e hustificacion di esaki? Na prome luga pa cumpli cu e tantisimo hotelnan cu ta planea pa wordo construi, pa cu un turismo cu ya ta muestra di ta satura y ta den un fase di sobre-turismo, manera e.o. AHATA y parcialmente SER a bin ta señala. Ta argumenta cu lo ta necesario entre 10.000 pa 15.000 trahado di afo.

Na di dos luga, un presentacion di CAft cu a base di cifranan di SVB y tambe di parti di SER y otro organisacionnan, ta laga sa cu mas trahado di afo ta necesario pa por garantisa e nivel di cuido social aki na Aruba, particularmente pa loke ta AZV y SVB. Den e caso aki CAft ta uza e calculacion cu SVB a haci di cu lo mester un 28.000 trahado di afo.

UPP ta considera esaki un quick fix! Parce cu no kier stimula ideanan creativo pa bin cu solucion cu ta mas duradero pa nos fondonan y alabes ta percura pa e felecidad di un pueblo. Gobiernonan no tabata tin un maneho of politica di poblacion stipula. Hopi a wordo papia di capacidad di carga, e peso cu esaki lo nifica pa nos pueblo y e finanzas di e pais aki. E mesun CAft cu ta exigí pa Aruba baha su gastonan di presupuesto, ta propone un solucion riba termino cortico, cu riba e mesun termino aki tambe lo nifica cu pais Aruba lo mester mas inversion pa adapta nos in-



fraestructura pa asina nos por carga e fluho di mas trahadonan di afo. Y tanto SVB como AHATA ta admiti cu esaki lo tin su banda menos positivo pa Aruba, unda cu mester bay tene cuenta cu otra e trahado bin di afo e kier trece henter su famia cu ne. Cu e maneho actual di laga “el abuelo, la abuela, tio y tia” bini, e pregunta si e nos meta lo wordo logra of nos lo bay pone mas peso riba nos fondonan social. Ningun di instancianan aki en cambio, no a haci un calculacion ta cuanto e inversion aki mester ta. Cuanto scol, caretera, cas, auto riba caya, camber di hospital y logicamente hende pa traha den e sectornan aki tambe ta necesario.

UPP for di aki kier a pidi tur e instancianan, manera CAft, SVB, SER, AHATA y gobierno, kende segun e articulo den Amigoe, na mei 2019, durante di un simposio di inmigracion na Corsou, a compromete hunto cu Sint Maarten y Corsou, cu hunto lo bay pa asisti otro riba e tereno aki di inmigracion, loke ta wordo yama tambe e maneho of politica di migracion laboral, pa publica tur documento y estudionan cu tin riba e tema aki. Di e manera pa nos como pueblo tambe por tin algo di bisa, prome cu ta laat. Parce cu ta premira cu e trahamento di tanto hotel lo rekeri mas inmigrante. Pues asina aki kier cuminsa cu un strategia pa hustifica e expansion exagera aki?

Djis pa uza cifranan di SVB, ta nifica cu banda di e 28.000 contribuyente nobo, lo por bin extra 3 hende pa cada uno, cu lo 84.000 persona. Pues un total di 112.000 hende extra riba e pida baranca aki. Riba cada km lo mester biba 1350 hende? Tur esaki a consecuencia di e maneho ANTI-ARUBIANO di “porta habri” desde 2009 di AVPOR y cu dimension extra di “porta y bentana habri y sin kozijn” di e gobierno POREDmep!

Den e dianan aki UPP lo sigui informa riba e topico aki!

Prome Minister Wever Croes:

Traspaso di refineria y terminal pa Aruba ta prome paso pa yega na terminacion contrato cu CITGO


DIABIERN 28 di februari 2020, RDA y Citgo a firma un 'transfer agreement' unda cu Citgo ta transferi e operacion di e refineria y terminal pa RDA. E transferencia a tuma lugar diasabra 29 februari 2020.

Esaki ta e prome paso den e proceso pa, den un forma amical, termina e acuerdonan entre Citgo y RDA y Gobierno. E terminacion a bira necesario na momento cu a bira claro cu Citgo no por cumpli cu su obligacionnan mas pa motibo di sancionnan imponi pa gobierno mericano. Pronto Gobierno lo presenta un concepto di ley na Parlamento unda cu lo trata e terminacion di contractnan. Despues di esey lo cuminsa e proceso pa busca otro operador pa e terminal y refineria.

Pa prome biaha den historia, Pais Aruba, a traves di RDA y TDEA, ambos companianan estatal, lo opera e transshipment terminal temporalmente. RDA/TDEA lo ta encarga tambe pa preserva e refineria mientras cu Gobierno lo cuminsa e proceso pa busca un inversionista/operador nobo pa esaki.



imediatamente diasabra atardi, y despues a invita prensa pa presencia e traspaso na gate di e refineria. E traspaso a bay na forma keto y sin mucho fanfaria, debi cu esaki no ta e terminacion di e contrato cu Citgo ainda, e terminacion por wordo efectua despues di aprobacion di Parlamento.



Minister-president
Minister van Algemene Zaken

REGERING VAN ARUBA

L.G. Smith Blvd. 76
Oranjestad, Aruba
Tel. (297) 526 4900

Na Presidente di Parlamento di Aruba

29 februari 2020

Honorable Presidente di Parlamento di Aruba,


Diabierna 28 di februari 2020, RDA y Citgo a firma un 'transfer agreement' unda cu Citgo ta transferi e operacion di e refineria y terminal pa RDA. E transferencia lo tuma lugar diasabra 29 februari 2020.

Esaki ta e prome paso den e proceso pa, den un forma amical, termina e acuerdonan entre Citgo y RDA y Gobierno. E terminacion a bira necesario na momento cu a bira claro cu Citgo no por cumpli cu su obligacionnan mas pa motibo di sancionnan imponi pa gobierno mericano. Pronto gobierno lo presenta un concepto di ley na Parlamento unda cu lo trata e terminacion di contractnan. Despues di esey lo cuminsa e proceso pa busca otro operador pa e terminal y refineria.

Pa prome biaha den historia, Pais Aruba, a traves di RDA y TDEA, ambos companianan estatal, lo opera e transshipment terminal temporalmente. RDA/TDEA lo ta encarga tambe pa preserva e refineria mientras cu gobierno lo cuminsa e proceso pa busca un inversionista/operador nobo pa esaki.

Gobierno di Aruba cu esaki kier informa Parlamento di e desaroyo aki.

Atentamente
Minister President di Aruba


E. C. Wever-Croes

cc. Lidernan di Fraccion di Parlamento di Aruba

Gobierno di Aruba a informa Parlamento di e desaroyo aki

Fiscal a pidi 12 luna pa traficacion di hende for di Venezuela

CARLOS Javier Miranda Refunjol y Xavier David Pereira Melendez dia 10 di maart lo haya sa si Hues a bay di acuerdo cu e demanda di 12 luna cu fiscal a haci contra nan. Dia 2 di november ultimo nan a trece un cantidad di persona Aruba di forma ilegal.

E duo aki a haya un susto di nan bida despues cu nan a caba di baha e hendenan y hasta nan a kere cu tabata pirata tabata ataca nan.

Riba e fecha ey Kustwacht tabata riba lama grandi controlando, ora cu nan a detecta un boto riba lama un poco for di costa, pero sin ningun iluminacion. A grita e hendenan pa nan para pero a ignora e grito. E personal di Kustwacht a dicidi di los tiro di advertencia y despues riba e motor, cu a duna nan un susto grandi.

Nan a confesa cu nan a caba di baha 10 hende banda di santana di cacho. Den Corte nan a sigura cu nan a baha e hendenan den lama no profundo, y cu nan tabatin zwemvest cu nan a bay cu nan tambe.

Hues a muestra cu Guarda Costa a haya informacion cu tin un boto for di Venezuela direccion Baby Beach cu velocidad halto. Ariba radar for di Curacao a mira esaki. Pa 11.30 di anochi Guarda Costa a mira e boto sin luz. A sende lus y sirena pero e boto a sigui navega. A los tiro di advertencia pero nan a sigui.



E ora ey miembronan di Guarda Costa a tira riba motor di e boto y asina esaki a logra para. Den e boto tabata C.R. y X.M.

Ta parce, basa riba declaracion cu nan a duna, esta e capitan y su ayudante lo a haya 200 dollar pa e trabou, mientras cu cada un di e "biaheronan" lo mester a paga entre 200 pa 350 dollar pa e biahe riesgoso pa Aruba. Tur e biahe tabata wordo regla door di un tal Roberto, kende ta esun a aserca nan pa haci e biahe pa Aruba. E homber Roberto ta esun cu a keda cu resto di e placa.

Necesidad tabata e motibo cu e acusadonan a tuma e trabou riesgoso y cu awe nan ta cera den KIA. Ambos ta bisa tambe cu ta prome biaha cu nan a haci e trabou aki, aunke cu fiscal ta duda. El a cuestiona e boto uza, cu no ta cumpli cu ningun reglanan di seguridad. Aki ta caminda cu e acusado Xavier a bisa cu e hendenan tabatin zwemvest bisti for di momento cu nan a subi e boto na Venezuela. Pa Ministerio Publico, e delito di traficacion di hende a keda proba, pasobra nan mes a ad-

miti esaki den declaracion di hende. A cuestiona cu nan a pone bida di e hendenan na peligro. A biaha den un boto chikito den cual tabatin 12 persona abordo y cos por a bay malo cu alkier momento. Nan no tabatin nada di iluminacion y e boto no tabatin un sistema di nabegacion. El a recorda un di e biahenan cu a termina den un tragedia unda cu dos persona a perde nan bida, hogando na costa di Aruba. "Traficacion di hende ta algo cu ta sosode hopi di Venezuela pa Aruba, unda e hendenan kier busca un miho bida na Aruba. Esaki tin hopi consecuencia pa Aruba tambe, hendenan kedando ilegal na Aruba," el a bisa.

Analizando e caso y comparando esaki cu otro casonan caba, Fiscal a dicidi di pidi un castigo di 12 luna di prizon, y e boto ta keda confisca.

E punto principal den defensa di e acusadonan ta cu Kustwacht a actua ilegal pasobra a detene e hendenan aki den awa territorial di Venezuela. Fiscal a reacciona bisando cu a actua ilegal pa motibo cu e persecucion a cuminsa den awa territorial di Aruba. Dia 20 di maart awor tin sentencia.

BO MESTER DI WASTE BUCKET RESIDENCIAL OF COMERCIAL?

ecotech aruba

YAMA

Mr. Bucket

594-3757
mrbucket@ecotech.dw

20 yrd Big Bucket

15 yrd Junior Bucket

10 yrd Small Bucket

Melvin Tromp di Partido AVP

Parlamentario Rocco Tjon ta sigui busca excusa pa no para responsabel

BUSCANDO tur forma pa laba man di loke el a haci, Parlamentario Rocco Tjon a purba di usa un caso sumario contra di Parlamentario Benny Sevinger, pa trata di limpia un parti scur di su bida.

Melvin Tromp di partido AVP a reacciona riba decision di Corte den Prome Instancia, cu a dicidi cu no tin motibo pa exige si Sevinger rectifica declaracionnan cu el a haci den direccion di Rocco Tjon, relaciona cu loke tabata bay rond riba Rocco Tjon pa loke un caso di pedofilia.

Ningun momento Corte a dicidi cu Rocco Tjon ta inocente di cierto acusacion cu ta bay rond relaciona cu su yiu muher, pero solamente a bisa cu Parlamentario Sevinger no a presenta ningun prueba di loke el a trece dilanti.

“Ta impresionante con Rocco Tjon ta buscando unda cu ta pa gara na dje pa tapa algo cu su persona ta bon na altura a sosode y cu a crea situacionnan delicado p’esnan involvi. Na varios ocasion mi persona a reta Rocco pa bin dilanti y aclaria e caso aki cu a sosode cu su persona y cu a pone cu el a wordo prohibi di tin contacto cu su yiu muher, pero nunca el a haci esaki y nunca el a desmenti algo cu a wordo treci dilanto contra su persona.

Anteriormente prome cu Parlamentario Sevinger a haci su declaracionnan den un conferencia di prensa, varios luna anterior mi persona na mas c’un ocasion a trece informacionnan fededigno dilanti sin nunca cu Rocco Tjon a acepta e reto pa bisa cu e cosnan aki no ta cuadra cu berdad.

T’asuntonan serio, pero mientras cu na varios ocasion su persona kier papia na varios ocasion riba integridad di hende, su persona mes no ta cumpli cu esaki dor di bin dilanti y admiti loke el a haci den e forma corecto.

Pa colmo Tjon ta bay usa otro colega Parlamentario, kende tambe tin un reputacion dudoso y kende a haya su mes involvi cu husticia y a wordo retira pa motibo di fraude cometi como Presidente di Fundacion Lotto pa Deporte, mustrando un biaha mas su falta di seriedad pa cu e caso serio aki.

Lo ta bon tambe pa sr. Tjon confirma si e ta na altura cu



hasta un carta a wordo dirigi na Gobernador di Aruba, caminda e mucha ta pidi permiso p’e no carga fam di su tata mas, ya cu ta informacion ricibi di hendenan cu ta hopi yega n’e caso aki.

Ta cosnan cu ta dificil pa sconde, ta dolornan grandi cu el a pone hende pasa aden y no ta cosnan cu no por simplemente tapa ya cu tin hende inocente involvi den e caso aki, pero Tjon si ta kere cu e por sigui cu su bida normal mescos cu nada a pasa.

No solamente Rocco Tjon a faya caba cu su propio sanger, pero e ta bayando como representante di pueblo cu no ta luchando pa pueblo, cu no ta para pa interes di pueblo y cu mescos cu henter su fraccion, no ta luchando pa sirbi interes di pueblo.

Un set di representantenan di pueblo cu ta sirbi interes di Gobierno riba interes di pueblo ya cu ningun ta saca un man pa presiona Gobierno pa yuda pueblo den su necesidadnan,

Cantidad di promesa a wordo haci sin cu nan a wordo cumpli y pueblo tin un Gobierno su dilanti cu solamente tin un solo solucion pa tur cos, cual ta medida y mas medida y na lugar cu Tjon y su coleganan lanta para pa pueblo, awor ta cla pa bolbe sacudi cabes y bisa si y pro mas medida contra interes di pueblo,” Melvin Tromp di AVP a declara.

Minister Maduro:

Aruba ta conta awor cu informacion detaya di e impacto directo di turismo riba nos economia

DIAHUEBS Minister Maduro a reuni cu sra. Vannesa Satur di United Nations World Tourism Organization (UNWTO) y ehecutivonanan di Oficina di Estadistica (CBS) riba e trabou nan cu a wordo haci pa asina Aruba por conta cu un 'Tourism Satellite Account' (TSA). E TSA ta brinda nos informacion detaya di e impacto directo cu turismo tin riba e economia di nos Pais, cual ta yega na 20% di nos GDP.

E informacion compila den e TSA ta importante, ya cu e TSA banda di ta duna bista riba e tamaño y impacto directo di turismo riba nos economia, ta brinda informacion detaya di e consumo di nos bishitantenan, e oferta y e importacion necesario pa cumpli cu e demanda aki.

Minister Maduro ta gradici sra. Satur y su coleganan di UNWTO y tambe tur e ehecutivonan di CBS pa e trabou impor-



tante aki pa Aruba. E TSA lo keda oficialmente publica na juni 2020.

DIP ta cla pa reanuda servicio pa publico dialuna 2 di Maart, 2020

DESPUES cu casi 1 luna cu departamento di DIP a keda cera pa; 1. Construcccion / Renobacion, 2. Introduccion di nos Sistema Digitalisa y Autonomo, 3. Curso pa prepara nos empleadonan pa e fase nobo, nos tin e grato noticia pa anuncia, cu entrante dialuna 2 di Maart 2020, DIP lo reanuda servicio pa publico.

Mester informa cu tin algun trabounan cu falta pa keda cla ainda, pero esaki lo no stroba e servicio pa publico. E cambionan cu a tuma luga, pero ainda falta, ta simplemente pa optimalisa e servicio cu nos ta brinda na publico.

Cambionan na unda cu DIP lo ilustra mas transparencia den nos servicio. Claridad na unda bo documento ta para. No mester bin DIP mas pa algun servicio, pero por haci esaki online via nos website, y mucho mas.

Tur esaki ta cambionan positivo cu nos clientenan por spera den e dianan venidero.



DIP lo keda informa publico atraves di varios medio di comunicacion riba e cambio y e fase nobo cu ta bay wordo efectua. Pero por lo pronto, nos servicio lo reanuda completamente dialuna 2 di Maart.

Tres den detencion den accidente den Franse Pas



DIASABRA marduga den careda di 3:30 911 a haya informacion cu un auto a bolter den Franse Pas.

Mesora polis a sali direccion pa Franse Pas.

Den e bocht di Rooi Taki bay zuid yegando e bocht polisnan a topa cu un auto gebolter y algun meter mas leu un Toyota Tercel.

Pues tawata trata di un accidente entre dos auto. Na prome instante a pensa cu tawata un auto. Agentenan a baha y nan a cuminsa averigua si tur hende ta bon y esaki tawata e caso tambe. Tur esnan involvi tawata pafo di nan auto.

Pero, agentenan a nota tambe cu e esnan involvi den e accidente tawata bou influencia.

E accidente mes a sosode momento cu un dama na stuur di e Toyota Tercel tawata bayendo direccion zuid o sea pa Sabana Basora.

E Hyundai Getz tawata biniendo di pazuid. Eynan ta unda cu e dama bastante bou influencia a bay na su man robes y a dal contra e Getz pone perde control bolter.

Na stuur di e Getz tawata tin un cabayero, cu a sali despues di un rato sin un rasca loke ta bon. Na yegada di polis tur e partidonan tawata trankilo cu otro papiando, algo cu bo no sa wak mucho.

Posiblemente door cu nan tur tawata bou influencia.

Alco-sensor

Na final despues cu agentenan a tuma tur datos a yega e momento di laga e partidonan o sea esnan involvi supla. Prome tawata e dama, cu tawata na yoramento. El a supla y a surpasa e limite di alcohol stipula pa ley y mesora a wordo lesa su derechonan y tambe a wordo poni den boei.

Despues tawata turno di e chauffeur di e Hyundai Getz e tambe a surpasa e limite di alcohol y mescos cu e dama el a wordo bisa su derechonan etc etc y a pone den boei.

Na caminda pa e Transportwagen e dama a laga su culpa cay despues di algun papiamento e mester a subi den e Transportwagen toch.

Na final agentenan a detene un homber mas na e sitio cu tawata keda stroba polis su trabou.

Pues en total tres hende burachi a wordo deteni despues di e accidente.



Muher maltrata pisa

NA Boroncana un homber a ranca dama sak'e fo'i su auto bente abao. Maltrat'e y bay cu e yiu di e dama den e Honda CRV. E auto ta registra na un cas na Tarabana. Polis a bay na dicho cas. No ta conoci si a haya e sospechoso ni tampoco e auto.

Tabata ayera madrugada net despues di 12:00am cu bisiñanan a yama Polis pa un hende muher benta riba caminda yorando y gritando di dolor na altura di Boroncana # 10.

Polis y ambulance a yuda e pover señora, kende a conta cu su pareha a maltrat'e den auto, Y dilanti di su yiu, bent'e for di auto y despues sigui cu e yiu.

Ta trata di un auto marca Honda modelo CRV cu number A-9103, registra na un adres den Tarabana. Polis a cuminsa un buskeda p'e auto y e mucha, pero sin mucho resultado.

Ambulance a brinda asistencia n'e sitio mes y despues a transporta e victima pa Hospital. Polis a atende e señora riba tin un relacion toxico asina, pasobra segun e señora, no ta prome biaha.

A splik'e cu den casonan asina, e casonan di maltrato lo no stop mas tampoco, tanten no entrega un keho y sali di un relacion asina.



Minister Dangui Oduber:

Aruba t'e prome pais den henter Caribe pa tin su propio Academia di Futbol

DIAHUEBS atardi Minister di Deporte sr. Dangui Oduber tabata presente na Compleho Deportivo Frans Figaroa p'e lansamento di e Academia di nobo di AVB. Aki e mandatario a hiba algun palabra den presencia di e directiva di AVB, miembronan di CONCACAF sres. Jason Roberts y Etienne Siliee, miembro di FIFA sr. Marlon Glean y miembronan di prensa.

Minister Oduber a menciona cu e Gobierno aki ta sostene tur proyecto cu ta yuda na eleva e nivel di deporte na Aruba. Segun e Minister, Gobierno ta haciendo tur esfuerso pa yuda deporte, apesar di e retonan cu tin, Gobierno ta sigui yuda organisacionnan deportivo por medionan creativo. E maneho di Ministerio di Deporte tur ta e.o. riba mantencion di infraestructura di facilidadnan deportivo.

Varios compleho deportivo ta hayando materialnan, lusnan LED y turf. Actualmente veld di United tambe ta hayando su lusnan p'asina e ekipo por practica parti anochi.

E mandatario a bisa cu di su parti e lo sigui reuni cu diferente federacion deportivo p'asina mira unda Gobierno por yuda mehora e deporte.

Sin facilidad e muchanan no por practica e deporte y e deporte no ta wordo desaroya.

Ta pesey Minister Oduber a haci palabracionnan concreto cu Federacion di AVB pa institui un comision cu ta consisti di stakeholders manera Ministerio di Deporte, AVB y demas organisacionnan gubernamental cu ta di importancia cu meta pa traha un plan encuanto construccion y mantencion di facilidadnan di futbol.

Minister Dangui Oduber a manda palabranan di felicitacion na directiva di AVB pa cu e bunita proyecto. Tambe e mandatario a gradici FIFA y CONCACAF cu a sostene AVB den esaki. Por ultimo e mandatario a gradici ex-Presidente di AVB, sr. Rufo Kelly kende tabata e persona cu a trece e vision pa bin cu un Academia, masha pabien.

Pabien AVB y pabien Aruba cu un proyecto asina importante pa desaroyo di talento di futbol pa Aruba.



Turista a bolter cu UTV riba Avenida Nelson Oduber



DIADOMINGO mainta a yama Ambulance pa un turista cu a haya un accidente riba Avenida Nelson Oduber, antes Sasakiweg na altura di Divi Links. E chauffeur femenino a conta n'e sitio cu su helm tabata molesti'e, pa cual el a bay purba drech'e.

Den e proceso, el a perde control riba e vehiculo, dal den un pal'i luz y despues bolter banda di caminda. E señora turista a resulta levemente herida.

Polis no a presenta mes n'e sitio di accidente y Ambulance mes mester a cera caminda pa autonan no dal e victima cu tabata banda di e vehiculo UTV gebolter riba caminda. Paramediconan a brinda asistencia n'e sitio mes y no tabata necesario pa transporta e victima pa Hospital.

Ta algun taxista cu a pasa y mira con el a bay den scual cu e vehiculo y bolter, a baha pa yud'e mesora. Mester menciona cu e cantidad di accidentenan cu e tipo di vehiculonan aki ta aumentando tur dia bay, dunando un indicacion cla cu, sea e chauffeurnan no ta apto pa maneha nan of nos camindanan no ta prepara p'e tipo di vehiculonan asina.



“Huicio Perfecto” ta demostra cu nos Arubianonan mes por!

Diahuebs awor ta estrena pelicula di Aruba

DESPUES di añas di preparacion, filmacion, grabacion y edicion, awor t’asina leu cu diahuebs awor dia 5 di maart 2020 lo tuma lugar e “premiere” di e pelicula “Huicio Perfecto” na The Movies @ Principal na San Nicolas. Su siguiente dia e lo pasa tambe na The Movies @ Renaissance Marketplace.

E pelicula, cu a cuminsa ensaya na 2017, a graba na aña 2018 y a keda cla di edit aña pasa, awor ta subi pantaya grandi na The Movies.

Por cumpra ticket adelanta via e website www.TheMovieAruba.com y sigura bo lugar durante e premiere, aunke cu e prome 3 salanan ta sold out caba! Riba e dia ey lo tin un “meet & greet” na The Movies @ Principal despues di e prome pelicula.

Pa 6:00pm lo tin un evento Red Carpet, mientras cu lo start cu e pelicula pa 7:00pm den tur tres sala pareu. Riba e prome dia lo por saca potret cu e elenco y haci pregunta riba nan rol den e pelicula aki, tambe despues di e prome presentacion.

“Huicio Perfecto” ta produci y dirigi pa Angelo Croes. E grabacion y edicion di henter e pelicula tabata den man di Roy Croes, mientras cu Martin Buitenweg tabata encarga cu tur “side effect” y musicalisacion di e pelicula.

Ta un pelicula graba na Aruba mes, cu artistanan local y cu sin duda lo causa un impacto ora mire den un sala grandi di pelicula.

E trabounan rond di e proyecto aki, inicia na aña 2017, a inclui no menos di 30 actor di Aruba. Banda di e actornan tin mas di 100 figura local cu a participa activamente den e pelicula, cu ta graba den nos propio idioma, Papiamentu.

E pelicula “Huicio Perfecto” tin un duracion di 1 ora y 40 minuut, ta inclui escenanan romantico, accion, drama y hasta un poco humor.

E ta conta e storia con Aruba a hunga un rol masha importante, es mas, tabata e yabi clave den mundo di petroleo. Pero, separa di e industria petrolero, tambe e storia ta encera un cartel criminal cu tabata bou di investigacion di un escuadron elite di Polis.

“Huico Perfecto” ta un pelicula cu ta para pa su nomber, pasobra e ta contene escenanan den cual Bo ta haya bek tur locual Bo ta duna. Pues cu kico cu Bo haci den bida, e ta bin bek pa Bo... tardi of trempan!

A graba e escenanan na varios sitio riba nos isla, manera na edificio di Corte, den un hotel, den area industrial, den Marina Pirata Restaurant, den Franse Pas, na Fermin’s Bar, riba parkeerplaats di Do It Center na Shaba y mas.

E elenco principal ta inclui Alto Inspector di Polis (den bida real),



Alvin Molina como Django Maduro, Gionathan Croes como un Polis Mendoza, Abigail Sanchez como Jessy, e conocido Manuel de Silva a hunga pa Max Harms, Stephanie Croes como psicologo Dr. Angela de Cuba, Alejandro Dirksen cu tabata Fiscal di Ministerio Publico, Luty Martinez como Huez, Egmond Molina como “Turco” y Joylene de Nobrega como Narianna.

Bayendo un asistencia:

Agentenan policial herida den accidente serio na altura di Stadion Nadi Croes/Crismo Angela

DIABIERNA anochi den careda di 9'or varios patruya policial a cuminsa bay direccion Pos Chikito, unda algun colega lo a pidi refuerso pa un situacion cu tabata saliendo di man. Entre e patruyan tabatin esnan di Santa Cruz cu tabata cerca y cu a haci uso di zwaailicht y sirena pa bay Pos Chikito.

Segun testigonan, lo tabata trata di dos patruya bayendo cu velocidad halto zuid y na altura di Stadion Nadi Croes/Crismo Angela, un señora di edad di tabata na stuur di su Mitsubishi Lancer y dado momento a bay bira na su man robes y aki ta unda e auto di polis D-502 ta dal na banda di chauffeur parti dilanti. E señora ta scapa di a haya golpinan serio.

N'e sitio testigonan a conta cu e ambos agente herida a baha cana y despues e agente femenino lo a sak den otro, debi n'e golpi na pecho. Su colega masculino tambe tabata herida, pero asina mes lo tabata trata na consola y yuda su colega. Paramediconan na yegada despues di basta rato di a stabilisa y prepara e agente femenino a pone den ambulance y despues su colega tambe a bay den e mesun un ambulance. Pues probablemente no lo tabatin mas ambulance disponibel e momento ey.



Dos Honda Crv envolvi den accidente fuerte na Hato, lagando dos persona herida atras



DIABIerna anochi Polis a bay Hato unda auto lo a cay den greppel y n'e momento ey no tabata conoci si tin hende herida.

Na yegada Polis a constata cu tin dos Honda Crv envolvi, y un dama herida.

E dama lo tabatin basta dolor y p'e motibonan aki a pidi presencia di ambulance. Mirando cu e autonan ta riba caminda, a opta pa cera rotonde di Tanki Flip.

Polis a papia tambe cu chauffeur di e otro Honda Crv, y el a conta Polis cu e tabata bayendo direccion Pos Abou.

Dado momento e lo a perde control riba e auto y a baha caminda. Ora el a bay pa stabilisa e auto bek, el a kita bay zuid y dal contra trafico contrario cu tambe tabata un Honda Crv. Ambos vehiculo a sufri hopi daño material.

Dos ambulance a presnta y despues di sali cu dos persona herida direccion Hospital. Take-lwagen a presenta pa move e autonan for di caminda p'asina trafico por sigui normalmente.



Di dos dia di curso Mediawijsheid pa Studentenraad Unit S&S di Colegio EPI

Tabata tocante social media y fotografia



DIAMARS 21 di januari 2020 a tuma lugar e di dos dia di workshop pa Studentenraad Unit S&S di Colegio EPI cu ta trata Mediawijsheid. E topico riba e dia aki tabata fotografia y “create content on social media” cu a haya cooperacion di e oradoman Ayrton Tromp di ARTN Photography y Kimberly Maduro di Xclusivo Magazine.

Durante e atardi aki e studiantenan a haya informacion amplio tocante con pa saca potret di calidad, teniendo cuenta cu diferente aplicacion riba e camera cu nan ta uza. Tambe nan a haya informacion con pa set un camera prome cu saca potret.

Ayrton a trece diferente equipo di fotografia p’e studiantenan wak y asina amplia nan conocimiento den e mundo di fotografia.

Kimberly Maduro di Exlusivo Magazine a duna in-

formacion tocante crea contenido pa publica riba media social. Studiantenan a haya un bista di tur locual mester tene cuenta cune prome cu crea contenido y tambe planea na momento di crea y publica contenido.

Tambe Kimberly a conta tocante e importancia di “storytelling”. Na final e studiantenan a haya algun tools manera checklist, handouts y tambe apps cu nan por cuminsa uza den nan bida diario ariba e media social.

Begeleiders di Studentenraad di Unit S&S di Colegio EPI ta gradici Ayrton Tromp y Kimberly Maduro p’e informacion cu nan a comparti cu nos studiantenan. E studiantenan awor ta mas mihor prepara p’e uzo di social media y fotografia cu nan por pone den uzo p’e studentenraad yega mas cerca y interactua cu tur estudiante.




Detencion a cay durante problema di bisiña, pa motibo di un cacho cu lo a ataca e otro bisiña



DIABIERNA algo prome cu 9'or di anochi presencia di Polis a wordo pidi cu urgencia den Tangerinastraat (Tarabana) pa un problema di bisiña.

Na yegada e patruya a bin topa cu e doño di un cacho crioyo, e cacho su boca tabata tur na sanger.

N'e sitio Polis a bin compronde cu e bisiña lo a maltrata e cacho aki, pa motibo cu cacho tabata riba caya y lo a ataca e bisiña na momento cu e bisiña a sali for di su cura di cas.



Despues di esaki a surgi un problema cu a bay for di man entre doño di e cacho y su bisiña.


Segun varios habitante den e caya aki, e doño sa laga su cura di cas hopi biaha habri y e cacho ta sali bay riba caya.

E cacho ta brabo y e habitantenan tin miedo di dje, paso e ta ataca hende cu pasa den e caya aki. Aparentemente e lo a morde varios persona caba.

Polis a detene e bisiña pa maltrato y tambe a papia tur na bon cu doño di cacho, a splica nan riba e consecuencianan di laga e cacho brabo riba caya. Polis a transporta e bisiña pa Warda di Polis.



Dos señora herida den accidente na cruzada di Morgenster y un chauffeur deteni



DIABIerna anochi Polis tabatin tin man yen, mientras cu un auto di Polis a haye involvi den un accidente serio altura di ex Winston Veld tabatin otro accidentenan pasando.

Patruxa di Playa a bay cruzada di Morgenster pa un accidente cu basta daño material y dos señora herida. E autonan involvi tabata un Mitsubishi pick up y un Ford SUV.

Un di e señoreanan tabata sinti dolor na su nek y e otro tabata sinti dolor na un brasa cu el a caba di opera.

Pues un diabierna anochi den careda di 9'or unda cu Polis y ambulance a haya nan man yen.

Polis eynan a bay over tambe na detene un di e chauffeurman cu tabata maneha bou influencia.



Rebecca Jansen y Giannon Eights a logra triunfa den Off Road Aquathlon



RECIENTEMENTE Aruba Triathlon Association a logra organisa un otro evento exitoso cu e Off Road Aquathlon. Mey-mey di tur e furia di Carnaval, e participantenan a yega e competencia di aquathlon.

Mester bisa cu den e Off Road Aquathlon Sprint e participantenan mester a inicia e evento cu un recorido na pia di 4.4km pa despues landa un total di 750m pa despues finalisa e evento cu un careda na pia di 2.6km.

E landamento a tuma lugar den e awanan di Arashi, mientras e careda na pia a tuma lugar riba e beach di Arashi, mientras cu a pasa patras di Lighthouse. Pa loke t'e resultadonan final

mester bisa cu den categoria Sprint, Giannon Eights (39:13) y Rebecca Jansen (55:08) a logra un di prome lugar.

E proximo evento di Aruba Triathlon Association lo ta 7 y 8 di maart, e biaha aki 7 di maart cu un Kids Aquathlon na Roger's Beach na San Nicolas, mientras pa su mañan lo tin un Triathlon na Boca Catalina celebrando Dia Internacional di Hende Muher.

Stichting Sportsubsidie Aruba ta contento di por aporta y brinda e ayudo na Federacion di Aruba Triathlon Association, cu tur luna tin un of mas actividad riba nan calendario anual pa nan tri-atletanan.

Registra awo!

Manda bo e-mail na noticia@awemainta.com

Ricibi AWEMainta tur dia den bo inbox



www.awemainta.com



www.facebook.com/awemainta



583-1400



583-1444

Federacion di Tenis di Mesa a tene su torneo di ranking luna di februari

E sistema di ranking ta uno hopi importante pa Federacion di Tenis di Mesa, Aruba Table Tennis Association (ATTA) unda hungadornan tin cu hunga tur luna cada torneo pa keda cu e puntuacion maximo y posiciona nan mes entre e mihor nan cu a lo largo lo duna nan e paso pa representa Aruba den exterior.

E forma di ranking aki a duna su fruto mirando cu el a haci nos atletanan mihor cu mas dedicacion y determina pa saca e mihor di nan mes como atleta.

E competencia ta uno sano y e mayoria ta haya e oportunidad pa midi nan nivel den exterior esaki den torneonan renombra den region y continente. Aruba Table Tennis Association lo sigui haci su maximo esfuerzo pa cumpli cu nan atletanan organisando torneonan individual y team esaki tanto na Santa Cruz y San Nicolas.

Den e resultado di ranking den luna di februari 2020 nos tin den B klas na prome lugar Zhao Xie, na di dos lugar Franklin Lopes, na di tres lugar a keda Micheal Ling y ta na cuater lugar Ching Ho Chung.

Pa lora t'e categoria U15 nos tin na prome lugar, Josielienne Boekhoudt, na di dos lugar a keda Dylan de Leca, na di tres lugar nos a haya Ethan Fan y na di cuater lugar nos tin Brandon Deleca. E categoria di U11 tambe a mira accion unda e hoben Brandon de Leca a conquista e prome lugar sigui pa Chase Fan cu e termina na di dos lugar, mientras na di tres lugar a keda Tommy Chang. Den e categoria U13 e bataya tabata fuerte unda e hoben Wallace Fan a logra keda na di prome lugar sigui pa Ethan Fan na di dos lugar y Dylan de Leca a termina na di tres lugar.

Stichting Sportsubsidie Aruba ta contento di por aporta y brinda e ayudo na Federacion di Aruba Table Tennis, cu tur luna ta organisa e torneo di ranking pa nan atletanan di tenis di mesa.



Hisadornan di peso,

Nathaly Geerman y Laertes Araque lo competi den e Rogue Weightlifting Challenge 2020 na Columbus, Ohio

E siman aki, lo tuma lugar e Rogue Weightlifting Challenge na the Arnold Sports Festival na Columbus, Ohio. Esaki ta un evento di nivel brons cu ta clasificacion p'e Weganan Olimpico Tokio 2020.

Federacion di Pesas, Aruba Amateur Weightlifting Association tambe lo forma parti di e magno evento aki unda lo participa cu dos atleta cu ta forma parti di seleccion di Team Aruba.

E atleta femenino, Nathaly Geerman ta entrenando duro y ta den un bon condicion fisico unda e lo competi den categoria di 76kg femenino. Tambe Aruba lo competi cu e hoben Laertes Araque den categoria di Youth cu ta dispone di un tremendo condicion y lo competi den categoria di 89kg. Coach internacional Walter Llerena lo t'e persona encarga pa guia nos dos atletanan den exterior.

Stichting Sportsubsidie Aruba ta contento di por aporta y brinda e ayudo na Federacion di Amateur Aruba Weightlifting Association, cu lo competi cu dos atleta den e Rogue Weightlifting Challenge na the Arnold Sports Festival na Columbus, Ohio.



Ricibi Awemainta tur dia den bo Inbox

Registra awo!
Manda bo e-mail na
noticia@awemainta.com

Baseball di Aruba ta di luto cu morto di un di su grandinan, Rufus Arrindell

TABATA diabierna merdia, cu nos a recibi e tristo noticia cu un ex-Manager di Marlboro y un di e mihor nan den nos historia di Little League Managers a bay laga nos. Ta trata aki di Rufus Arrindell.


Un tremendo pitcher di Esso Baseball Team y pa hopi Rufus Arrindell tabatin un di e mihor salida pa primera base si no t'e mihor. Hopi coreador a ser sorprendi na primera.

Deporte di Baseball cu fayecimento di Rufus Arrindell, Baseball en general na Aruba ta di luto. Aruba tin hopi pelotero cu a duna nos isla nomber. Manera Rufus Arrindell, kende nunca a haya ningun reconocimiento manera e mester ta. Rufus.

Un tremendo pelotero y excelente Manager, pero mas aun, un gran persona. Ken ta Rufus Arrindell. Nos a conoce a conoce Rufus Arrindell como pitcher di ESSO, despues como manager di Sapolin Little League. Rufus tabata coach, e promer di Aruba Little League cu a bay Campeonato Latino America y del Caribe na Puerto Rico. E tempo ey na 1968, representando Aruba y nan tabatin sr. Chipen Chirino como Manager.

Na 1978, Rufus a pasa pa maneha e gran organisacion di Marlboro, unda Marlboro a titula campeon Aruba y di Antiyas. Rufus a coach y tabata Manager di seleccion di baseball AA y manera menciona tabata coach di Little League.

Na su famia y na tur esnan cu a conoce, ta bay awe nos mas sincero condolencia. Cu Rufus sosega na paz.



Royal
Aurora
Funeral Home & Crematory

Mira con Dios a salba mi,
Tur mi confiansa ta den djE,
Mi n' tin miedo:
Señor Dios ta mi forsa, mi refugio.
E mes t'Esun cu a salba mi
Isaías 12:2

Cu tristeza na nos curason nos ta anuncia fayecimento di nos esposa, mama, wela y ruman

Maria Dirksz-
de Lugo

Cariñosamente yama:
"Moeder, Machi y lja"
*12-12-1934 - †25-02-2020



Na nomber di su
Esposo: Belen Lugo

Yuinan: Carmen Lugo y Rolando Hoek
Marcella Lugo
Etwina y Hans Oudshoorn-Lugo
Elivia Lugo
Beltran Lugo
Roberto Lugo
Maria Lugo
Enrique Lugo
Bernardo Lugo
Omaira y Jan Hendrik Flanegin-Lugo

Nieto(a)nan: Michelle y Rudolfo Dirksz-Hoek
Mariaeuzinha Lugo y yui
Rafael Lugo
†Endrich Lugo
Jonathan Oudshoorn
Jordy Lugo
Siegfried Hart
Shannon Flanegin
Stefanie Wernet y yuinan
Sean Flanegin
Sam Flanegin
Kevin Lugo
Nicole Lugo
Nina Eliza Lugo
Noa Elina Lugo

Rumannan: †Teresita Dania-Dirksz y familia
†Margarita Dirksz y familia
†Cristobal Dirksz y familia
†Dora Dirksz y familia
†Reina Dirksz y familia
†Beatrix Leong-Dirksz y familia
Tina Tsu-Dirksz y familia
Marta Dirksz y familia
†Norma Dirksz y yui
Florentina Dirksz y familia
Rudolf Dirksz y familia
Swa y cuñanan: †Calixta Sanchez-Lugo y familia, Cosmelina
Arias-Lugo y familia, Arcadia Padilla-Lugo y familia, Josefina
Rojas-Lugo y familia, Thomas Lugo, Jesus Lugo y familia, †Marichi
y esposo tur na Venezuela
Mihor amiganan: Veneranda Thomas y familia, Juliana Todd y
familia, Xiomara, Minerva y Argenis Perozo y familia na Venezuela,
Maritza Colina y familia na Venezuela, Vilma

Subrino(a)nan, primo(a)nan, ihanan y demas familia na Aruba,
Venezuela y Hulanda, bisiñanan, amigo(a)nan y conociman.
Demas familia: Dirksz, Lugo, Hoek, Oudshoorn, Hart, Flanegin,
Wernet, Maduro, Dania, Tsu, Leong, Lu, van den Berg, Sanchez,
Arias, Padilla, Rojas, Thomas, Todd, Perozo y Colina.

Oportunidad pa condolencia lo ta dialuna 2 maart 2020 for di
7'or pa 9'or di anochi na Royal Funeral Home.
Ta invita pa asisti na acto di entierro cual lo tuma lugar diamars 3
maart 2020 for di 3'or pa 4'or di atardi na Pro Cathedral San
Francisco de Asis na Playa, despues lo sali pa santana catholico
na Playa.

Nos ta pidi nos disculpa si den nos tristeza nos por a lubida un
of mas familia.
Despues di entierro nos no ta ricibi bishita di condolencia na
cas.

Royal
Aurora
Funeral Home & Crematory

Mi no a muri, ta p'esey mi no a bisa ayo. Mi a djis habri
mi halanan y bula bay. Boso a keda atras pero no laga
tristesza domina boso. Keda uni cu otro, esey lo ta un
alegría pa mi alma. Recordami cu hopi amor.

Cu inmenso dolor na nos curason nos ta participa cu a
bay sosega den brasa di Señor

Helen Lidwina
Feliciana

*12-01-1954 - +27-02-2020



Na nomber di

Su mayoran:
Harry "Chonay" y Mona Feliciana-Ras

Su yiu stima:
Helliene Henriquez

Su rumannan:
Roy y Editha Feliciana-Odor y familia
Nelson "Bukel" y Carmen Feliciana-Geerman y familia
Grace y +Enty Giel y familia
Tito y Mary Feliciana-Boekhoudt y familia
Deca Feliciana y Hurby Palfit y familia
Armando "Mando" y Miriam Feliciana-de Cuba y familia

Su tantanan:
Señora viuda Tina Geerman-Ras y familia
Señora Maria Ras y familia
Señora viuda Luisa Feliciana-Winterdaal y familia
Señora viuda Imelda Feliciana-Tromp y familia

Manera ruman: Jolanda y Roque Mathilda y familia
Merita y Benky Eckmeyer y familia

Su prima amiga di cas: Jacky Feliciana
Ex-cuñá: Madelyn Oduber
Madrina: Señora viuda Mena Dubero-Feliciana

Ihanan:
Rachelle Flanegin, Jimmy Feliciana, Marylin Feliciana,
Erny Giel y Jean-Marc Farro

Tata di su yiu: Ronald Henriquez y familia

Wela di su yiu:
Señora viuda Luisa Henriquez-Falconi y familia

Sobrino y sobrinanan, primo y primanan, demas familia,
amigo, conocer y bisiñanan, coleganan di Botica del
Pueblo y tur su ex-coleganan di trabou.

Ta invita pa asisti na acto di entierro cu ta tuma lugar
diamars 3 di maart 2020 for di 9or pa 11or di mainta na
Misa Santa Filomena na Paradera y lo sali despues pa
Santa Catolico Pastoor Kranwinkel na Paradera.

Condolencia ta tuma lugar dialuna 2 di maart 2020 di
7or pa 9or di anochi na AYO 31-B.

Na lugar di flor of krans, un donacion pa Edmund Harms
Foundation ta altamente aprecia. Lo tin un box disponi-
bel den misa.

Nos ta pidi disculpa si den nos tristesa nos por a lubida
un of mas persona.

Royal
Aurora
Funeral Home & Crematory

"Señor a trata mi segun mi bon conducta, E'la recom-
pensa mi pa mi mannan limpi, pasobra mi a sigi Señor
su camindanan y mi no a peca bira lomba pa Dios. Tur
Su decretonan m'a tene mi dilanti, nunca mi no a
rechasa su mandamentonan."
Salmo 18:20-22

Cu dolor na nos curason,
nos ta anuncia fayecimento di nos ser stima:



Mirto Emilio Koolman

*02-11-1959 - †26-02-2020

Acto di entierro lo wordo anuncia despues

Royal
Aurora
Funeral Home & Crematory

Gradicimento y Invitacion

Pa medio di esaki familia kier a gradici tur esnan
cu na un manera of otro a duna nos sosten, consuelo y
forsa durante e tempo dificil cu e fayecimento y entierro
di nos defunto stima:



Anna Kelkboom-Jacobs

Boso muestra di atencion ta di hopi aprecio y un gran
sosten pa nos. Un danki na un y tur cu a manda carchi,
krans, whatsapp, email y a hasi yamada nan telefonico.

Un danki special ta bay na broeder y zusternan di
Pavilojoen, departamento Azalia. Tambe na Aurora
Funeral Home pa cu su bon servicio y atencion.
Boso muestra di atenshon tabata un gran Consuelo pa
nos.

Na mes momento nos ta invita familia,
bisiña-, amigo- y conociman
pa compaña nos na un Santo Sacrificio di Misa na misa
Pro Catedral San Francisco na Playa diaranson 4 di
maart 2020 pa 7 pm y despues pa un rosario na Piedra
Plat # 121-A

Boso presencia ta altamente aprecia.

Detencion den esfera relacional


Royal Aurora Funeral Home & Crematory

"Laga tur loke ta spera mi ta bunita
Laga tur locual cu mi encontra na caminda ta bunita
Laga tur locual cu mi laga atras ta bunita y
Laga esakinan termina den buniteza"

Cu inmenso tristeza na nos curason, nos ta anuncia fayecimento di nos tata, nos abuelo, nos bisabuelo, nos ruman y nos omo stima

Bernardo Flanegin

Mihor conoci como:
"Papa Ben" of "Ben"
*08-11-1942 - †25-02-2020



Na number di su:

Yiunan:
Remigio V. (Rambo) Flanegin y Morela Peroso
†Bernardo (Jun Jun) Flanegin y yiunan
Richard (Nun) Flanegin y esposa Angella y yiunan
Gregory R. (Za) Flanegin y esposa Maria y yiunan
Laida Maluska Flanegin y yiunan
Ruthmila M. Lesandrina y yiunan
Benito Flanegin y yiunan na Merca

Mayoman:

†Remigio y †Louisa Flanegin-Florencia

Mama di su yiunan:

†Gloria Maduro-Ridderstaat
Maria Irena Diaz
†Sonia Lesandrina

Rumannan:

†Brigida Flanegin
†Romanus Flanegin
Dora y esposo †Kerino Kock-Flanegin y yiunan
†Toribio Flanegin y yiunan
†Urbano Flanegin y esposa Ludwina Ras y yiunan
Anna M. Flanegin y yiunan
Filma Flanegin y yiunan

Nieto- y nietnan, bisanieto- y bisanietanan, sobrino- y sobrinanan, prima- y primonan, ihanan, comer- y compeman, tur conocir di Dialyse Imsan, tur su amistadnan di Young Fellow Barcadera

Demas famia: Flanegin, Florencio, Maduro, Donata, Every, Peroso, Emerenciana, Ridderstaat, Tromp, Dijkhoff, Erasmus, bayne, Peña, Kock, Mathilda, Martinus, Navas, Thiel, Angela, Croes, Dania, Vrolijk, Willems, v/d Berg, Colina, Wernet, Dirks, de Cuba, Ras, Laurens, Kelboom, de Mei, Werleman, Balde na Hulanda, Carolina, Pereira, Landburg, de la Cruz, Geertruida y Rosel

Nos disculpa si den nos tristeza nos por a lubida un of otro famia of conocir.

Oportunidad pa condolencia: Royal Funeral Home, diamars 3 di maart 2020 di 7'or pa 9'or di anochi.

Ta invita pa e acto di entierro cu lo tuma lugar diaranson 4 di maart 2020 di 2'or pa 4'or di atardi na misa Inmaculada Concepcion, despues saliendo pa Santana catolico Santa Maria na Sta Cruz

WILLEMSTAD - Diabièrnè 28 di febrüari, alrededor di 12.53 or, Central di Polis a dirigí un patruxa na un cas den área di Klein Sta. Martha pa un problema relacional, caminda e sospechoso a lòs algun tiro den laira.

Despues di su acto el a bandoná e sitio riba un scooter. Riba caminda pa Pannekoek un patruxa a topa cu e scooter bayendo den direccin di Fontein.

Mesora e unidad policial a bay su tras, na momento cu e sospechoso a nota esaki, el a manio-brá cu e scooter y a accidentá den un van-bus. E chofer di e scooter aki a haña algun lesion e.o. rasca na su cara y un kap bao di su wowo.


Durante di un contròl riba e sospechoso, Polis a haña un arma di candela den un tas cu e tabatin den su poder. N'e adrès ariba mencioná tambe e agentenan a haña algun cashi di bala. Polis a confiscá e arma y cashinan di bala.

Despues di a ricibí tratamento médico a detené e hòmbler sospechoso A.D. nacé na Còrsou di 27 aña di edad, y a present'é dilanti di un Fiscal auxiliar kende a ordená su encarcelamento pendiente di mas investigacion.

Royal Aurora Funeral Home & Crematory

"Laga tur loke ta spera mi ta bunita
Laga tur locual cu mi encontra na caminda ta bunita
Laga tur locual cu mi laga atras keda bunita y
Laga esakinan termina den tur buniteza"

Cu Inmenso tristesa na nos curason,
nos ta anuncia fayecimento di



Anthony Rene Leander Sr.

*15-12-1946 - †27-02-2020

N number di su:

Esposa :
Myrna Leander-Quandt

Yiunan:

Carlos (Bebito) y Maria Mejia-Franciscus
Jemina Mejia
Anthony Rene Leander Jr.

Nietonan:

Jada Mejia
Jadon Mejia
Jearre Bermudez Mejia
Sari Leander
Doutze Leander

Rumannan:

Edith y Papi Isenia -Frans y famia (Hulanda)
Elgin Daal (Colombia)
Dorothy Leander y Yiunan (Hulanda)
Gilda Leander (Korsow)
Beatrix Dindial-Leander (Korsow)

Amigonan di cas:

Michael Odor
Edine Maduro
Betty Villareal


Y demas Famianan : Leander Quandt Mejia Bermudez Franciscus Dreessen de Nobrega Briceño Pereira Castro Zimmermann Steenhuisen Inees Odor Gumbs Webb Tromp La Moira Palm Dirks Lopez Henriquez Tholel Daal Coffie.

Ta invita pa asisti na acto di despedida y cremashon diamars 3 di maart 2020 for di 2'or pa 4'or di atardi na Aurora Funeral Home.

Royal Aurora Funeral Home & Crematory

"Señor ta mi wardador, mi'n tin falta di nada
Den cunucu di yerba berde e ta ponemi sosega.
E ta hibami na awa trankil,
Pa mi bolbe haña forsa".
Salmo: 23

Cu hopi tristesa pero agredido
pa tur loke ela hasi y significa pa nos, nos ta anuncia
fayece den number di Señor:



Senny Ronald Maduro

Mihor conoci como "Mo Cheng" of "Cheng"
*14-06-1957 - †24-02-2020

Na number di su:

Mayoman: †Lucila Ras y †Marcial "Chai" Maduro

Casa: Dianne Maduro-Arrindell

Rumannan: Meredith Mulder-Ras y famia, †Charles "Charly" Maduro, Suzanne Ras y famia, Donny Ras y famia, †Karel "Ben" Ras y famia, †Harold Ras, Walter y Cira Maduro-Webb y famia, Tico Maduro y famia, Lientjie y Johnny Dijkhoff-Maduro y famia

Stima manera yiu: Rowald y Osmarre Croes

Tanta- y omonan, comer- y compeman, sobrino- y sobrinanan, primo- y primanan, amigo- y amiganan.

Ex coleganan di Varis Heavy Equipment.


Demas famia: Maduro, Ras, Arrindell, Dijkhoff, Mulder, Lampe, Willems, Lacle, Tromp, Croes, v/d Biezen, Colina, Faro, de Cuba, Rojas, Loepstok, Boekhoudt.

Ta invita pa acto di entierro cual lo tuma lugar na Misa Sta Filomena na Paradera dialuna 2 di maart 2020 di 9'or pa 11'or di mainta. Despues lo sali pa Santana Catolico na Paradera

Nos ta pidi nos mas sincere disculpa si den nos tristesa nos por a lubida algun persona of famia



E unico corant GRATIS



Abona awo

Manda un e-mail na:

Noticia@awemainta.com

y skirbi e palabranan: *"Ami Kier Abona"*

Like nos riba facebook

Keda "up to date" y like nos riba facebook
www.facebook.com/awemainta



Subi riba nos website

www.awemainta.com

AWEMainta completamente

DIGITAL